

方等部

金光明最勝王經疏

卷二十二
之二十三

金光明最勝王經疏卷第二十二

唐三藏法師義淨譯

唐白馬寺翻經沙門慧沼疏

王法正論品第二十

王法正論品三門分別言來意者流通有三初十
六品學行流通中有五此卽第三品正明持學持
學有二初二舉昔後一勸今舉昔有二一爲增上
生道二爲決定勝道此品爲初又解以四天王護
國品說人王若能尊人重法正行弘經天等擁護
若不如是天等捨離故今此品舉昔人王正行弘

經勸勉時會有此品起。釋品名者。先離後合。王有三號。一曰皇皇者天王也。二曰帝帝者主也。三曰王王者歸也。爲眾所歸。亦通名君。又縱任自在。名之爲王。法謂軌則。正卽簡邪。亦名聖也。如愛語中起四淨語及八聖語。淨語卽不妄語等。聖語卽見言見等。論謂決擇循環研覈諸法道理。王卽能行法人。法正論者卽所行法。應云王正法正論。順天竺語云法正論。論是能論。正法是所論。王之正法正法之論。並依主釋。今此正辨王之正法論。不欲別解王及正法論也。解妨者問。地神請佛說王正

法何不自說指往事耶。答欲明三世法皆同故法尊勝故不自親說。但舉往事問。若爾何故不舉過去佛說而引力尊幢王耶。答理國依俗事故舉過去梵王所說。據實梵王亦佛邊聞爲四王說。如下善生於寶積所聞。金光明不云佛說問。往力尊王并子妙幢。今誰是耶。答有釋妙幢卽今妙幢。又云卽釋迦佛。詳此二釋無文遮許。取捨任情。

爾時此大地神女名曰堅牢。於大眾中從座而起。頂禮佛足合掌恭敬。

此之品文大分爲三。初地神陳請。次世尊爲說。後

大衆喜行。初復分四。此一請儀。

白佛言。世尊。於諸國中。爲人王者。若無正法。不能治國。安養衆生。及以自身長居勝位。

二舉所爲。

惟願世尊。慈悲哀愍。當爲我說王法正論治國之要。

三陳所請。

令諸人王得聞法。已如說修行。正化於世。能令勝位。永保安寧。國內居人咸蒙利益。

四明所益。

爾時世尊於大衆中告堅牢地神曰。汝當諦聽過去。

有王名力尊幢其王有子名曰妙幢受灌頂位未久
之頃爾時父王告妙幢言有王法正論名天主教法
我於昔時受灌頂位而爲國主我之父王名智力尊
幢爲我說是王法正論我依此論於二萬歲善治國
土我不曾憶起一念心行於非法汝於今日亦應如
是勿以非法而治於國云何名爲王法正論汝今善
聽當爲汝說

次世尊爲說有三初對眾敕聽次過去下述昔緣
起後爾時力尊下陳昔正法述昔緣起有八一能
所教人二爾時下明所授之法世主卽梵王修四

無量方爲世主。明教慈悲起。必能拔苦與樂。三我
於下明得法之緣。四我之父下明得聞法處。五我
依下明我能行學。六汝於今下誠子隨修。七云何
名爲下聞。敕請教。八汝今下敕聽許說。此意於父
邊聞復教其子者。明父子恩深教必實益。故勸聞
者敬重依行。

爾時力尊幢王卽爲其子以妙伽他說正論曰。

陳昔正法文分爲二。此佛標序。

我說王法論利安諸有情爲斷世間疑滅除眾過失。
一切諸天主及以人中王當生歡喜心合掌聽我說。

正陳彼說有七十三行頌分二初二頌力尊敕聽
後七十一頌爲陳正論。敕聽中初一行述論益次
三句教所備。後一句敕聽爲說。問前長行中但爲
其子云何勸聽更有天主人王答長行文略頌中
廣故。又解正爲誠子。意謂此論稱理廣益天主人
王皆當歡喜。故汝今應合掌聽說。

往昔諸天眾集在金剛山四王從座起請問於大梵
梵主最勝尊天中。大自在願哀愍我等爲斷諸疑惑。
下七十一頌爲陳正論。大文分三初二頌論起所
因。次二頌發問。生起後六十七頌正陳其論。初中

有五。初二句。眾集處。次一句。能請人次。一句。所問者。次二句。讚彼論。次二句。請爲說。

云何處人世而得名爲天。復以何因緣。號名曰天子。
云何生人閒。獨得爲人主。云何在天上。復得作天王。
發問生起。總有四問。如文可知。意各有三。一問其
號依德。立即并問立號所由。所由則是問王行何
正法。得名王等。若不爾者。四王但問其名。云何天
主。言問我治國法。故薩遮尼乾子經第二云。王言
大師。彼諸王等。何故名王。答言。大王。王者。民之父
母。以能依法攝護眾生。令安樂。故名之爲王。此卽

總標。次則釋云。大王當知王之養民當如赤子移乾去溼不待其言。何以故。大王當知王者得立以民爲國民心不安國將滅矣。是故王常當慮民如念赤子不離於心。當知國內人民苦樂水旱風雨飢飽老少病患獄訟有罪無罪有功無功。如是知者名不離心。如是知已以力將護所應與者及時給與所應取者。念當籌量役使知時不奪人利。禁肅貪暴人得安樂。是名護國名之爲王。今此問答意亦同彼。第三問意現在當來由何業行生處人世得名爲天等。由何業行生在天上得作天王。故

下答云由先善業力生天得作王等。西方國法是物各有十名。今人王舉三天王舉一。以影於餘。

如是護世閒問彼梵王已爾時梵天主卽便爲彼說護世汝當知爲利有情故問我治國法我說應善聽。六十七頌正陳其論有三。初二頌序昔許說次六十頌半天主正陳後是故汝人王下四頌半勸勉依學。初中分二。初一頌力尊標序次一頌天主許說誠聽。

由先善業力生天得作王若在於人中統領爲人主。天主正陳有二。初三頌答名及業。二問卽令修善。

更作來因。後三十三天主下五十七頌半通答問。
得號所由。卽陳正論。卽令修其現益。初復有二。初
一頌答後二問。後二頌答初二問。此初也。

諸天共加護。然後入母胎。旣至母胎中。諸天復守護。
雖生在人世。尊勝故名天。由諸天護持。亦得名天子。
答前有二。初一頌半答第一問。後一半答第二問。
然由先善業力。言亦流至諸天共加護。

三十三天主分力助人王及一切諸天。亦資自在力。
除滅諸非法惡業。令不生教。有情修善。使得生天上。
人及蘇羅眾并健闥婆等羅刹旃荼羅悉皆資半力。

父母資半力令捨惡修善諸天共護持示其諸善報。若造諸惡業令於現世中諸天不護持示其諸惡報。通答得號所由陳其正論文復分二。初五頌略標後五十二頌半廣釋。標中有三。初二頌標諸天助王行正法他益有三。初一頌天助。次一頌王化化中初半滅惡後半生善。次一頌半標人神共護自益。或亦是益他。由人神助力令王化他捨惡修善共護自益。言羅刹旃荼羅者。旃荼羅此云嚴懺執守惡者。卽羅刹中執惡之者。此意惡此尙護況餘善者。後諸天共護下一頌半標由令行善化人得。

諸天護。初半標示。後一頌別示善惡所得因果。問造善可護。造惡如何護。答。由昔修善。今得爲王。故造惡時。天示惡相。護令改修。

國人造惡業。王捨不禁制。斯非順正理治。擯當如法。若見惡不遮。非法便滋長。遂令王國內姦詐日增多。王見國中人造惡不遮。止三十三天眾咸生忿怒心。因此損國政。諂僞行世間。被他怨敵侵破壞其國土。居家及資具積財。皆散失種種諂誑生。更互相侵奪。由正法得王而不行其法。國人皆破散如象踏蓮池。惡風起無恆。暴雨非時下。妖星多變怪。日月蝕無光。

五穀眾華果苗實皆不成。國土遭饑饉。由王捨正法。
下五十二頌半廣釋分二。初三十五頌明王違正
法故禍臻。後十七行半明王依正法故福臻。準瑜
伽六十一及王法正理論明王之過失王之功德。
王衰損門王方便門。王可愛法及能引發王可愛
法。各有多門。廣如彼辨。若別配此行相稍難。問此
名王法正論。彼瑜伽同王法正理論名目相順。何
不依彼以釋。答理不一途。仁王般若薩遮尼乾子
等皆明王行治國之法。非彼皆同。然配無違。且依
此經分之爲二。初三十行廣明違正論。後如是無

邊過下五頌結成違正法。廣明分三。初八頌明見人造惡不遮失。次若王捨正法下九頌明王自行非法失。後國中最大臣下十三頌明見臣造過不除失。初中復四。初一頌明見惡應遮。二若見惡下一頌不遮惡。廣三王見國中下因茲天忿。四因此損國政下五頌。遂有禍生。禍生有五。一頌怨敵壞國。二財散相侵。三禍起所因。四災變並現。五國土飢饉。五行如次配準可知。第三禍因中初半因後半喻。

若王捨正法以惡法化人。諸天處本宮見已生憂惱。

彼諸天王眾共作如是言此王作非法惡黨相親附
王位不久安諸天皆忿恨由彼懷忿故其國當敗亡
以非法教人流行於國內鬪爭多姦僞疾疫生眾苦
天主不護念餘天咸捨棄國土當滅亡王身受苦厄
父母及妻子兄弟并姊妹俱遭愛別離乃至身亡歿
變怪流星墮二日俱時出他方怨賊來國人遭喪亂
國所重大臣枉橫而身死所愛象馬等亦復皆散失
處處有兵戈人多非法死惡鬼來入國疾疫徧流行
王自行非失分四初二句明王捨正法二次兩句
天見心憂三次兩頌諸天共議四次六頌災禍遂